



Die Chriemhild träumte

Von den Nibelungen

I. Auentiure.

Uns ist in alten mären. wunders vil geseit.
von heleden lobebären. von grozer arebeit.
von freude vnt hochgeciten. von weinen vnt klagen.
von koner recken striten. moget ir nu wnder horen sagen.

Es waz in Burgonden. ein vil edel magedin.
daz in allen landen. niht schoners mohte sin.
Chriemhilt geheizen. die wart ein schone wip.
dar umbe muosen degene. vil verliesen den lip.

Ir pflagen dri kunige. edel vnt rich.
Gunther vnt Gernot. die rechen lobelich.
vnt Giselher der iunge. ein wetlicher degen.
die frowe was ir swester. die helde hetens in ir pflegen.

Ein richiu chuniginne. frow Ute ir moter hiez.
ir vater der hiez Dancrat. der in die erbe lies.
sit nach sine lebene. ein ellens richer man.
der och in siner iugende. grozer eren vil gewan.

Die herren waren milte. von arde hoh erborn.
mit kraft vnmazen chone. die rechen vzerhorn.
da zen Burgonden. so waz ir lant genant.
si fromten starchiu wnder. sit in Etzelen lant.

Ze Wormze bi dem Rine. si wonten mit ir chraft.
in dienten von ir landen. vil stolziu ritterschafft.
mit lobelichen eren. vns an ir endes zit.
si starben iamerliche. sit von zweier frowen nit.

Di dri kunige waren. als ich gesaget han.
von vil hohem ellen. in waren vndertan.
och die besten rechen. von den man hat gesaget.
starch vnt vil chvone. in scharpfen striten vnverzaget.

Daz was von Tronege Hagene. vnt och der bruder sin.
Danchwart der snelle. von Metzzen Ortwin.
die zwene margraven. Gere vnt Ekkewart.
Volker von Aseze. mit ganzem ellen wol bewart.

Ruomolt der chuchen meister. ein v3 erwelter degen.
Sindolt vnt Hynolt. dise herren wosin pflegen.
des hoves vnt der eren. der drier kunige man.
si heten noch manigen rechen. des ich genennen niemen kan.

Danchwart der was marschalch. do was der nese sin.
Erhsetze des kuniges. von Mezen Ortwin.
Sindolt der was schenche. ein weltlicher degen.
Hynolt was chamberäre. si chunden hoher eren pflegen.

Von des hoves ere. vnt von ir witen chraft.
von ir vil hohen werdekeit. vnt von ir ritterschafft.
der die herren pflagen. mit freuden al ir leben.
des enchunde iv ze ware. niemen gar ein ende geben.

In disen hohen eren. trumte Chriemilde.
wie si zuge einen valchen. starch schon vnt wilde.
den ir zwene arn erchrommen. daz si daz mo3te sehen.
ir enkunde indirre werlde. leider nimmer geschehen.

Den troum si do sagete. ir mwoter Voten.
sine chundes niht beschaiden. baz der goten.
der valche den du ziohest. daz ist ein edel man.
in welle got behoten. du mu3st in schier vloren han.

Was saget ir mir von manne. vil liebiv moter min.
ane rechen minne. so wil ich immer sin.
s33 schon ich wil beliben. vnz an minen tot.
daz ich von rechen minne. sol gewinnen nimmer not.

None versprich ez niht zefere. sprach ir moter do.
solto immer hercenliche. zerwerlde werden vro.
daz chommt von mannes minne. do wirst ein sehone wip.
ob dir got gefuget. eins rehte goten ritters lip.



:frou : ute: :chriemhilt:

Die rede lat beliben. vil liebiv frowe min.
es ist an manigen wiben. vil diche worden schin.
wie liebe mit leide. zeungest lonen chan.
ich sol si miden beide. sone chan mir nimmer missegan.

Chriemhilt in ir mote. sich minne gar bewach.
sit lebete div uil gote. vil manigen lieben tac.
das sine wesse niemen. den minnen wolde ir lip.
sit wart si mit eren. eines vil werden rechen wip.

Der was der selbe valche. den si in ir trovme sach.
den ir beschiet ir mvoter. wie fere si das rach.
an ir nehsten magen. die in slozen sint.
durch sin eines sterben. starp vil manich mvoter kint.